

Маҳалладош

«Маҳалла» дастури назоратимизда

КИЧИК ИНШООТЛАР ҚАД КЎТАРМОҚДА

МАҲАЛЛАЛАРИМИЗДА кейинги йиллар ичида аҳоли турмуш даражасини яхшилаш, қадимий урф-одатларни тиклаш, ёшларни баркамол қилиб камол топтиришда ота-боболаримиз меросидан фойдаланган ҳолда кўпгина ишлар қилинди. Ободончиликка эришишда эса «Маҳалла» дастури катта аҳамиятга эга бўлаяпти. Чунки бу ҳужжатда барча вазифалар аниқ ва пухта режалаштирилган. 1990 йилда белгиланган вазифаларни амалга ошириш учун 1 миллион 800 минг сўм ўзлаштирилди. Бу йил эса мана шу мақсадларга 722,5 минг сўм сарфланади.

Биргина «Баҳор» маҳалласи 200 метр, «Нилуфар» маҳалласида 400 метр масофага сув қувурлари ётқизилди. Бунга 86 минг сўмлик маблағ сарфланди. Йил охиригача яна 1,2 километр узунликда қувурлар ўтказилади. Бунинг учун 170 минг сўм пул сарфланади. Маҳаллаларда усти ёпиқ тўйхона, чойхона ва новвойхоналар қурилатганини таъкидлаш зарур. Ҳозир мана шундай кичик иншоотлар «Иттифок», «Сергели-7», «Гулистон», «Оқибат» маҳаллаларида қад ростламоқда.

Шунга ўхшаш мисолларни кўплаб келтириш мумкин. «Нўғай Қўрғон» ва «Ўзгариш» маҳаллаларида 3-4 километрга яқин йўллар асфальтланди. Кўчалардаги барча эски симёғочлар ўрнига янгиси ўрнатилиб, электр нури билан таъминланди. Ёрдамчи хўжаликларга ем-хашак сотиладиган дўкон қурилиб, ишга туширилди. Маҳаллада яшовчи уруш ва меҳнат фахрийларининг хонадонлари телефонлаштирилди.

Катта айлана йўлининг маҳаллани кесиб ўтадиган қисми икки четидан пиёдалар учун йўлчалар қурилиб ишга туширилди. «Салор» ариғига райониимиздаги оталиқ корхоналар ёрдами билан 30 минг сўм маблағга кўприк қурилмоқда.

«Кум-Ариқ» маҳалласидаги деярли барча хонадонлар газлаштирилди. Шу ҳудуддаги омонат банкининг янги бўлими очилди, почта хизмати йўлга қўйилди. Ҳозирги пайтда маҳаллада универсал дўкон, поликлиника, боғча, 3-автокомбинат томонидан спорт майдони қурилиши олиб борилаяпти. Яқин вақт ичида бирин-кетин булар ҳам ишга тушади.

Яқиндагина «Гулистон» маҳалласида жамоат маркази биносини қабул қилиб олган эдик. Уни кўп қаватли уйлар бунёд этаётган қурувчилар совға қилишди. Бу масканда маҳалла ободончилиги ва оёқошталлиги учун жон куйдирувчи жамоат ташкилотлари фаолият кўрсатишаяпти. Марказ таълим-тарбия ва тарғибот-ташвиқот ўчоғи ҳам бўлиб қолиши керак. Бундан 1 йилча бурун ҳудуд шундай марказ «Сергели-8» мавзесидаги С. Раҳимов номи маҳалла ахлига топширилганди. Шундан сўнг ишлар анча жонланиб қолди. Маҳалла комитети раиси, уруш ва меҳнат фахрийси Хуррам Ашуров саъи-ҳаракати туфайли бу ерда кўплаб тadbирлар ташкил этилмоқда. Қариялар, уруш ва меҳнат фахрийлари учун ошхона, чойхона хизмат кўрсатиб турибди. Вақти-вақти билан байрамлар, концертлар, шунингдек учрашувлар ўтказилмоқда.

Дастурда кўзда тутилган «Кум-Ариқ» маҳалласи канализацияси, «Кўйлик-7» мавзесида яқка тартибдаги уй-жой қурилиши, Навоий номи маҳалладаги «Чош-тепа» кўчасида яшовчи аҳолини ичимлик сув билан таъминлаш масалалари ҳали ҳал этилмади. Сабаби, «Сувсоз» трести маблағ ва моддий ресурслар йўқлиги туфайли бу объектиларни режага киритмаган.

Йил охиригача «Кум-Ариқ» маҳалласидаги дўкон қурилиши охирига етказилади. Яқин келажакда «Куш Қўрғон» маҳалласида 37-поликлиниканинг янги бўлими очилади.

Шуни алоҳида қайд этиш зарурки, райондаги барча йирик корхона ва ташкилотлар амалда маҳалла комитетларига бириктириб қўйилган. Улар ҳар томонлама ёрдам бермоқдалар. Район Кенгаши жамғармасидан эса маҳаллалар аҳолисига гишт, шифер, ёғоч, тахта, комбикорм ажратилмоқда.

Шавкат БОБОЖОНОВ,
халқ депутатлари Сергели район
Кенгаши раисининг ўринбосари.

Обуна—92

ЯНГИАРИҚЛИКЛАР ТАШАББУСИ

КИРОВ районидаги бу жамоа аҳиллиги билан азалдан маълум. Маҳалла комитети кўплаб ибратли ишлар қатори обуна мавсумини уюшқоқлик билан ўтказишга ҳам муносиб ҳисса қўшмоқда.

Утган йили уруш ва меҳнат фахрийлари, фаол отахонлардан 12 нафари маҳалла жамғармаси, ҳисобидан «Маҳалладош»га ёзилишган эди. Улар пойтахтимизда рўй бераётган янгиликлар ҳамда ўзгаришлардан ўз вақтида хабардор бўлиб боришаётгани учун кўрсатилган бундай ғамхўрликдан миннатдор.

Фаоллар яқинда маслаҳатлашиб, кўп болали ва кам таъминланган оилаларга ҳам кўмак беришга қарор қилишди. Шундай қилиб келгуси йилдан бошлаб рўзномамизни 15 та оқла бепул ўқийдиган бўлди.

Ўрнат олса арзийди, шундай эмасми?

Шавкат САЪДИЕВ.



Бозор иқтисодиётининг шартларидан бири корхоналарни энг замонавий дастгоҳлар билан таъминлашдир. Бунинг ўз вақтида тушунган «Чевар» тикувчилик ишлаб чиқариш бирлашмаси раҳбарияти яқинда гўдаклар кўрпасини тайёрлаш учун мўлжалланган дастгоҳни Италиядан сотиб олди.

Дастгоҳ бирлашманинг 3-цеҳига ўр-

натилди. Айни пайтда бу янги дастгоҳнинг сир-асрорларини тезда ўрганиб олган илғор ишчи Шохиди Қосимова унинг тўхтовсиз ишлашини таъминламоқда.

СУРАТДА: Шохиди Қосимова янги дастгоҳни моҳирлик билан бошқармоқда.

Холмат Мирзакаримов сурати.

Президент Фармони—амалда

БОЗОР ҲИСОБ-КИТОБИНИ ЎРГАТМОҚДА

ҲОЗИРГИ қийин иқтисодий шароитда қишлоқ хўжалик ва чорвачилик маҳсулотларини кўпайтириш, шу билан бозорда улар нархини пасайтириш катта аҳамиятга эгадир.

Маҳалламизда 164 та хўжалик истиқомат қилмоқда. Турмушимиз яхши, фаровонлик ва ҳамжиҳатлик ҳукм сурмоқда. Барчанинг диққат-эътибори қийинчиликларни ақл-заковат билан енгиш, оила иқтисодиётини яхшилашга қаратилган. Хонадонларнинг ҳар бирида ўртача 6 сотихдан ер бор. Мана шу жойдан йилига, бир, нари борса икки мартадан ҳосил олинаёпти. Эҳтиёждан ортиқча маҳсулотлар бозорга олиб чиқиб сотиляпти. Агар ишни тўғри ташкил этсан уч маротаба экин етиштириш мумкин.

Фаоллар билан ҳисоб-китоб қилиб кўрсак ҳар бир

хонадонда қорамол, камида 20 тадан парранда боқилаётган экан. Ўзбекистон ССР Президентининг Фармонида кўзда тутилганидек хашак, сомон, омухта ем билан етарли миқдорда таъминласак, сут, тухум, гўшт янада сероб бўларди. Келгусида шу масала билан шуғулланувчи гуруҳ тузишимиз керакка ўхшайди.

Ҳозирги кунда маҳалла фуқароларидан кўпчилиги ташкилотларда ишлашаёпти. Шу боис улар бирор масалада ёрдам сураб жамоа хўжалигига мурожаат қилишса «сен хўжаликда ишламайсан», деб ишини ҳал қилиб бермайдилар. Ташкилотлар эса ўз ходимларининг ҳолидан хабар олишмайди. Улар ҳам серфарзанд, шароит яратиб берилса оиласи билан қишлоқ хўжалик маҳсулоти етиштиришга му-

носиб ҳисса қўшган бўлардилар.

Қишлоқ Кенгашларининг фаолияти талабга жавоб бермайди, деб ўйлайман. Сабаби, бу жамоалар маҳаллалар билан ишлаш ўрнига статистика маълумоти йиғиш билан шуғулланишмоқда. Шу ўринда бир таклифим бор. Маҳалла комитетларининг раислари район ва қишлоқ депутатлари кўрадиган масалаларда яқиндан иштирок этсалар муаммолар тезроқ ҳал бўлар, халқнинг норози-лигини келтириб чиқараётган ишларга чек қўйиларди.

Бозор муносабатларига ўтишимиз, хоҳ қишлоқда, хоҳ шаҳарда бўлсин, уйда-бурунлик билан турмуш кечиришни тақозо этмоқда.

Қолмон ЭРГАШЕВ,
Чиноз районидаги Оржоникидзе номи маҳалла комитетининг раиси.

Қ а л о в и топилармикан?

«БЕШЕҒОЧ» кўчаси бўйлаб бораётган эдим. Юк кўтариб олган 3-4 жувон ис-сиқдан бўғриқиб: «Қани энди бироз ҳордиқ чиқариб, чой ичадиган жой бўлса», деб ўзаро гаплашиб қолишди.

Илгари шундай масканларни шаҳарнинг истаган жойида учратишингиз мумкин эди. Ёдимда, шундоққина кўча ёқасидаги катта дарахтлар остига қаравотлар қўйилиб, устига палос, кўрпачалар ташлаб қўйиларди. Чарчаган ёки чанқаган йўловчи келиб ўтириши билан эғнида оппоқ яхтак, белига қийиқча боғлаган чойхоначи олдида икки чойнак чой (бири фамил, бири кўк) ва патнисда нон, қанд келтириб қўярди. Чой ичиб, маз-

за қилиб дам олиб кетардик. Қани энди шу кунлар қайтиб келса. Иложи бор жойларда, кичик боғлар, катта дарахтларнинг ости супури-либ, сув сепилиб ҳордиқ жойлари ташкил этилишини истардик. Шаҳардаги мутасадди раҳбарлар бу масалани ҳал этишнинг қаловини топишармикан?

К. ХОЛМАТОВ,
уруш ва меҳнат фахрийси.

«Лангар»га

сув беринг

ПОЙТАХТДАГИ қадимий маҳаллаларда озмунча одам яшамайди. Ижтимоий шароит етарли бўлмаса ҳам улар ота-боболаримиз чирогини ёқиб ўтиришибди. Аммо сабр-қаноатнинг ҳам чегараси бор, дейишади.

Кўчамиз аҳолисини 30-40 йилдан бери сув масаласи

қийнаб келади. Ёш болаларнинг бўйига номуносиб челақ, човғум кўтариб, сув ташинишларини кўргач ичинг ачимай иложи йўқ.

11-боши берк кўча газлаштирилган, минг раҳмат. Лекин хонадон эгаларининг фиғони фалакка чиқаяпти. Чунки фарзандларининг ризқидан қирқиб йиғилган пулларга газ қувурлари қиритилгани билан ёлчителиб фойдаланилмаяпти.

Ҳадемай қиш келиб, ташвишимиз янада ортади. Тошкент шаҳар сув хўжалиги ва газлаштириш бошқармаларидаги ўртоқлар ёрдам кўрсатинг.

Пойтахтнинг Эски шаҳар қисмидаги «Лангар» кўчаси, 11, 12-боши берк кўчаларида истиқомат қилувчи аҳоли номидан:

Илёс УМАРОВ,
Аҳмад ЗАРИПОВ,
Манзура ИСРОИЛОВА,
Жами 39 имзо.

Ваколат

БИРИДАН ҚУВОНАСИЗ, БИРИДАН РАНЖИЙСИЗ

МАНА, яқин икки йилдирки, депутатларимиз фаолият кўрсатишмоқда. Улар сайловолди учрашувларида халқимизга кўплаб ваъдалар беришган эди. Хўш, ўз сўзларининг устидан чиқишяптими?

Бизнинг маҳаллада 13 мингдан зиёд аҳоли яшайди. 15-мавзедан СССР халқ депутатлигига Акром Қурбонович Эргашевни сайлаганмиз. У киши район партия ва ижроия комитетлари кўмагида хайрли ишларни бажарди. Чунончи, 273-ўрта мактаб олдида кесиб ўтувчи захариққа 18, 19-мавзелардан келадиган чиқинди сувлар оқизиларди. Эндиликда катта ҳажмли қувурлар ётқизибли, мактаб жамоаси ва шу агрофда яшовчи аҳолини чивин балосидан қутқазилди. Сайлов арафасида бир эмас, тўртта бекат қурилиб, фойдаланишга топширилди. 15-мавзеда қад кўтарган кўп қаватли уйлар олдидаги йўлаклар бузилиб кетган эди. Ҳаммаси текисланиб, асфальт ётқизилди. Бир гектардан ортиқ майдон эса депутатнинг саъй-ҳаракати туфайли ахлатдан тозаланди.

Ўзбекистон ССР халқ депутати, автомобиль йўллари олийгоҳининг ректори Салим Пулатович Пулатов ташландиқ жойга 500 тупдан ортиқ мева-дархат ниҳоллари олиб келиб экишда яқиндан ёрдам берди. Катта майдоннинг яна бир томонига болалар яйраб ўйнаши учун спорт жиҳозлари ўрнатилди. Тошкент шаҳар Кенгашининг депутати, 273-ўрта мактаб директори Мавлуда Исмаилова, район Кенгаши депутатлари Маъмура Эргашева ва Акбар Алиевларнинг ғайрати билан болалар ва катталар хиббони, шунингдек йўлаклар электр нури билан таъминланди.

Юқорида номлари тилга олинган барча депутатлар ёрдамида учта хонадонни навбатдан ташқари олди. Бу жойлар уч болали ёлғиз она Зулхумор Эрматова, маҳалламиз фахри, ўн фарзанднинг отаси Оловуддин Нажмиддинов ҳамда «Маърифат уйи» учун ажратилди.

Маҳалламизда шундай ўзгаришлар бўлаётган бир пайтда ўзларини четга олиб, «Сен менга тегма, мен эса сенга» қабилида иш тутаётган депутатлар ҳам йўқ, эмас. Булар кимлар, деб ўйларсиз. Район Кенгашининг депутатларидан бир гуруҳи сайловчилар билан учрашганда кўпгина ваъдалар беришганди. Улар болалар хиббонини жиҳозлаш, йўлакларга асфальт ётқизиш, тунги ёриткичлар билан таъминлашни ўз зиммаларига олишди. Афсуски, депутатлар бу ваъдаларни бажариш у ёқда турсин, кўнгил учун бирон марта маҳалламизга қадам ранжиди қилмадилар. Ҳар ҳолда мен раис сифатида 15-мавзеда бирорталарини кўрмадим.

Ўз бурчларига масъулият билан ёндашмаётган бундай кишиларга нисбатан халқимизнинг муносабати ўзгариб бориши табиий.

Эгамназар ҚОДИРОВ,
Юнусобод даҳасидаги
«Ўзбекистон ССР 50
йиллиги» маҳалла
комитетининг раиси.

Мева-сабзавотлар шаҳарликлар дастурхонига

ОФАРИН, СОҲИБКОРЛАР!

Тошкент шаҳрини сабзавот ва полиз маҳсулотлари билан таъминлашга жумхуриятимизнинг ҳамма вилоятлари ҳам ўзларининг муносиб ҳиссаларини қўшиб келмоқдалар. Жумладан, Андижон вилояти ҳам кўп йилдирки Акмал Икромов райони аҳолисини ўзларининг пешона терлари билан етиштирган ширин-шакар меваларию, қовун-тарвузлари билан баҳраманд қилиб келмоқдалар.

— Андижонлик соҳибкорлар хизматидан район аҳолиси гоёта мамнун бўлмоқда, — дейди. «Фарҳод» бозори бошқарувчисининг муовини Қудратилла Муродонов. — Чунки, улар, йил ўн икки ой давомида ўзларининг ноз-неъматлари билан Акмал Икромовликларни хурсанд этиб келмоқдалар. Ҳафтанинг ҳар пайшанба ва якшанба кунлари орасида ярмаркалар ташкил этиляпти. Масалан, ўтган ойнинг охириги кунларида ўтказилган ярмаркага картошка, пилёз, помидор, сабзавотлардан 23 тонна, олма, ўрик, шафтоли ва бошқа резавор мевалардан 36 тонна, ҳаммаси бўлиб эса 61 тоннага яқин маҳсулот келтирилди. Ҳаммаси бўлиб вилоятнинг 119 тоннага яқин маҳсулоти сотилди.

Андижонликларнинг олиб келган маҳсулотлари фақатгина ярмарка тарзида эмас, балки райондаги корхоналарга, маҳаллаларга ҳам жўнатилади. Бу тадбир аҳоли учун жуда қулай бўляпти. Иккинчидан маҳсулотларнинг нархи бозордигидан 30—40 фоизга арзон.

— Олиб келинган полиз маҳсулотлари, — дея гапидавом этди Қудратилла Муродонов, — аввало лабораторияда яхшилаб текширилади.



Андижон вилоятининг турли районларидан маҳсулот олиб келган йигитлардан Умурзоқ Шамсиддинов, Абдурасул Отажонов, Мамадамин Абдуллаев, Ҳабибулло Холматов, Солижон Тиллаев, Равшан Ғофуров, Шукурилло Тожибоев, Содиқ Маматўраевлар билан суҳбатлашганимизда улар бу ердаги шароитлар ёмон эмаслигини, лекин, мева ва сабзавотларнинг айримлари йўлда келгунча бузилаётганлигини қуюниб гапирдилар.

— Вилоятимиз раҳбарлари бу борада яхшироқ уйлаб кўришса ёмон бўлмасди, — дейди жалолқудуқлик Солижон Тиллаев. — Масалан, олиб келган нокларимизни деярли сотолмадик. Чунки, Андижондан бу ерга келгунча машинанинг ёмонлигидан маҳсулотнинг катта қисми бузилиб, сув бўлиб кетди. Ҳозирги куннинг об-ҳавоси ҳаммага маълум. Шундай экан, узоққа олиб юриладиган мева-сабзавотлар учун маҳсус, совутгичли машиналар ажратилса мақсадга мувофиқ бўларди.

Ҳа, бу йигитнинг айтгани-



ча бор. Маҳсулотлар қанчалик сифатли олиб келинса, бу ҳар томонлама фойдали бўлиши барчага маълум. Барибир ҳам катта қийинчиликлар билан бўлсада

пойтахтликлар дастурхонини тўкин қилаётган андижонлик соҳибкорларга офаринлар айтамыз.

Муҳиддин БОЗОРОВ.

СИЗДАН УГИНА, БИЗДАН БУГИНА

Ўлкамизда саҳий ёз ўз неъматларини кўз-кўз қилаётган айни пишиқчилик пайти. Ҳозир шаҳримизнинг гавжум кўчаларидаги кўчма дўконларда мева-сабзавот маҳсулотлари сотилаётганининг, ярмаркалар ташкил этилганининг гувоҳи бўласиз. Сабаби бободехонлар йил бўйи етиштирган маҳсулотларини шаҳарликлар дастурхонига тортиқ қилишмоқда. Ана шундай манзарани шаҳардаги корхоналар олдида ёки корхоналарга қарашли дўконларда ҳам кўриш мумкин. Хўш, корхоналарга бу маҳсулотлар қаердан келади? Ишчи-хизматчилар учун пишиқчилик неъматларини кимлар етказиб беради? Шу савол билан яқинда Фрунзе район ижроия комитетининг иқтисод бўлими мудири Абдумажид Усмоновга мурожаат этганимизда у райондаги мавжуд ишлаб чиқариш корхоналарига қарашли ёрдамчи хўжаликлар фаолияти ҳақида шундай ҳикоя қилди.

— Районимиздаги йирик саноат корхонаси ҳисобланган тўқимачилик комбинатида қарашли «Тўқимачи» шўро хўжалиги ёрдамчи хўжаликлар ичида энг каттаси, — дейди у. Бу хўжаликнинг умумий ер сатҳи 839 гектарни ташкил этади. Шундан 487 гектари қишлоқ хўжалик экинлари экиладиган ер, 386 гектари ҳайдалади-ган ер, 1 гектари техника, 49 гектари эса боғдорчилик ва узумчилик учун ажратилган ерлардир. Хўжалик меҳнат жамоаси 1989 йилдан буён ижара пудрати асосида иш юрит-

моқда. Хўжаликда етиштирилган барча қишлоқ хўжалик маҳсулотлари тўқимачилар дастурхонига етказиб берилмоқда.

Шу йилнинг ўтган етти ойи мобайнида хўжалик томонидан корхона ишчиларига 97,6 тонна картошка, 324,4 тонна сабзавот, 199,4 тонна қарам, 58,3 тонна помидор, 23 тонна мева, 29,4 тонна гўшт, 120,7 тонна сут маҳсулотлари етказиб берилди. Шунингдек, бу йил комбинат ишчилари учун режага қўшимча 2,2 миллион сўмлик маҳсулот жўнатишни ҳам мўлжаллаган. Хўжалик бўйича умумий сарф-харажат 2,1 миллион сўмни, кўрилган фойда эса 0,1 миллион сўмни ташкил этади.

Районнинг йирик корхоналаридан яна бири Тошкент тўқимачилик машинасозлиги ишлаб чиқариш бирлашмасидир. Унинг ёрдамчи хўжалиги Оҳангарон районининг Красногорск шаҳрида, теплица комбинати эса Янгийўл районининг Усмон Юсупов номи хўжалигида жойлашган. Оҳангарон районидagi хўжалик ер майдони 300 гектарни ташкил этади. Бу йил режадаги 100 тонна ўринга 114 тонна бугдой ўрилди. Хўжаликда ҳар йили ўрилган бугдойни шартнома нархида сотиб, фойда олинади. Бу йил хўжаликда мева дархати экилган боғ яна 4 гектарга кенгайтирилди. Етиштирилган маҳсулотларнинг деярли ҳаммаси корхона дўконларига жўнатишмоқда. Бундан ташқари, корхонанинг ҳар

бир ишчиси йилига 400 килограмм сабзавот, 200 килограмм картошка билан таъмин этилмоқда.

«Эльбор» ишлаб чиқариш бирлашмаси ёрдамчи хўжалиги Бўка районининг «Кремль» жамоа хўжалигида жойлашган бўлиб, хўжаликнинг умумий ер майдони 255 гектарни ташкил этади. Йил мобайнида мазкур хўжалик ҳам корхонанинг ҳар бир ишчиси учун 25 килограмм помидор, 40 килограмм сабзи, 67,5 килограмм пилёз, 187,5 килограмм картошка, 337,5 килограмм полиз экинлари етказиб беришни мўлжаллаган.

Шунингдек, райондаги бошқа бир қатор корхоналарнинг, жумладан, Тошкент қурилиш бош бошқармасига қарашли трест ҳамда саноат қурилиш индустрияси бирлашмасига қарашли ёрдамчи хўжаликлар ҳам шаҳарлик ишчи-хизматчилар дастурхонини тўкин қилиш, уларни саҳий ёз неъматлари билан тобора кўпроқ таъминлаш ниятида тер тўкишмоқда. Ўз навбатида корхона жамоаси ҳам ёрдамчи хўжаликларга чиқиб, мева-сабзавотларни йиғиб-териб олишда бободехонларга яқиндан ёрдам беришмоқда. Узаро ҳамкорлик алоқалари асосида тўқинчилигимиз заҳматкашлари меҳнати туфайли дўконларимиз сархил сабзавот ва мева-чевалар, полиз экинлари билан тўлиб, шаҳарликлар дастурхони кўркам бўлмоқда.

Зулфия ДУСМУҲАМЕДОВА.

Турмуш чорраҳаларида

ЧЎНТАКДАГИ СУРАТ

СОВЧИЛИКДАН қайтган кундан Хадича ая ўзини қўярга жой тополмайди. Эрига бўлажак келинни мақтаб кетди.

— Дадаси, қизнинг ота-онаси таглик-туглик экан. Уй-жойларини кўриб, оғзим очилиб қолди. Келин ҳам келишгангина.

— Шошилма, онаси, — деди эри бо-сиклик билан. — Синалмаган отнинг сиртидан ўтма, деганлар. Кишининг кўринишига қараб баҳо бериб бўлмайди. Алданиб қолиш мумкин. Қизнинг муомаласи қандай экан, билдингми?

— Йўқ, дэдаси. Қўшнилардан қаерда қиз бор деб суриштирсам, шуларникини кўрсатишди.

— Унда ўғлинг кимникига борганингни ҳам билмас керак.

— Айтганим йўқ.

— Кўрдингми?! Шошилма, балки ўзининг кўз остига олгани бордир.

Эрининг бу сўзларидан Хадича ая «Умр бир савдо, тиканни босиб олиб пушаймон бўлиб юрсам-а», деб ўйланиб қолди.

Орадан кўп вақт ўтмай у бўлажак келинга сеп олгани шаҳарга, бозорга тушди. Бир-иккита кўйлакка етадиган мато харид қилди. Дўконларни айланиб тушлик ҳам қилмади. Уйда овқатланарман, тевроқ бора-қолай, деб ортига қайтди. Трамвай тир-банд. Деразадан ташқарини кузатиб тура-верди.

— Синглим, холангизга жой беринг, — деди бир йўловчи рўпарадаги ўриндиқда ўтирган хушрўйгина қизга.

— Менга ким жой беради, — деди у зарда билан. — Бу катталар уйда ўтиришса бўлмасмикан! Ишдан ўлиб-тирилиб чарчаб йўлга чиқсанг шундайларга дуч келасан. Яна буларга жой бериш керак.

— Нега ундай дейсиз, сизнинг ҳам онангиз бор-ку! — деди ҳижолат бўлган йўловчи.

— Онамни тинч қўйинг. Онам бўлса, нима қилишни ўзим биламан.

— Болагинам, ҳали турмушга чиқмаган кўринасан, — орага тушди кекса аёл.

— Ақл ўргатиш бошланди... Ўзингизнинг болангизни эплаб олсангиз яхши бўларди.

Е тавба, ўн гулингдан бир гулинг очилмасидан туриб, одамларга шундай муомала қиласанми, қизим. Қўй уят бўлади...

— Бўлди, бўлди. Сизлар яхши, мен ёмон.

Йўловчилар таъналарини эшитиб келаётган Хадича ая қандай киз экан деб ўша томонга қаради. У танишдек туюлди. Қиз қора кўзойнагини ечгандагина ўша совчи бўлиб борган хонадонда кўрганини эслади. Лабини тишлаб қолган аёлни у ҳам кўриб қолиб, ўрнидан турди.

— Утиринг хола, келинг.

Хадича аянинг қўлига ҳеч нарса кирмади. Қиз эса худди ёв қувагандек, кейинги бекатда трамвайдан тушиб қолди.

Уйига хомуш қайтаётган Хадича ая икки қўлида оғир тўрхалта борлигини ҳам унутди.

— Холажон, тўрхалтангизнинг биттасини менга беринг, кўтаришаман.

Аёлнинг рўпарасида истараси иссиқ бир киз турарди.

— Майли олақол, болам.

Хадича ая қиз билан суҳбатлашиб кетиб, қандай уйига етганини билмай қолди. Чарчоғини, хафалигини унутди. Унинг ширин сўзлигидан сармаст бўлди шекилли.

Уйга кирди. Бироз дам олиб овқатга уннади. Шўрва пишунча тўпланган килларни чайиб қўйди, деб ишга киришди. Ўғлининг шимини сувага солаётганида чўнтағида нимадир борлигини пайқайди. Паспорт экан.

Ичидан ерга қандайдир сурат учиб тушди. Олди. Ҳозиргина ўзига ёрдамлашиб келган, кирои келин бўлади, деб ўйлаган қиз жилмайиб турарди. Сурат орқасида эса «Дилбардан Раҳимжонга эсдалик», деган ёзув ҳам бор эди.

— Ўғилганим келинни топиб қўйган экан-ку, мен бўлсам эшикма-эшик юрибман.

Хадича аянинг кўзларида севинч ёшлари пайдо бўлди...

X. МИРЗАЕВ.

Халқ севган санъаткорлар

ТЎЙЧИ ҲОФИЗ

ЎЗБЕК халқининг машҳур ҳофиз Мулла Тўйчи Тошмуҳамедов ҳақида кўп эшитганман. Қўшиқчилик санъати тилга олинганда биринчи навбатда шу кишини эслашди. Ўз вақтида Тошкент халқи эътиборини тортган Сайфи, Нажим ҳофизлар шу санъаткордан андоза олиб, катта ашула айтиш маҳоратини эгаллашган экан.

Уйимизда фатифон ва бир неча куйловчи ликопча бўларди. Саводим қишқи билан улардаги ёзувларни ўқиганман. Катта ҳарфлар билан «Мулла Тўйчи Тошмуҳамедов номли Тошкент пластинкалар заводи» деб ёзиб қўйилганди. Шунда санъаткорнинг чинакам халқ қўшиқчиси эканлигини тасаввур қилганман.

1962 йили Сухумида хизмат бурчимни ўтаётган эдим. Шаҳарга Ўзбекистон филармонияси гастролга келди. Шунда бир гуруҳ ўзбек аскарлари йиғилишиб, концерт-

га бордик. Таниқли артистлардан Дилором Шерова, Тоштемир Шарипов, Фахриддин Дўстмуҳамедовлар билан самимий суҳбатлашиб, машҳур ҳофизни эсладик. Биринкетин у ҳақида яхши гаплар айтилди. Шу пайт санъаткорлардан бири: «Орамингда сизлар ёқтирган ҳофизнинг ўғли ҳам бор. Ана, ўзиам келаяпти», деди. Ўрта бўйли, қорачадан келган, истараси иссиқ, ёқимли йигит ўзини Эркин Тўйчиевман, деб таништирди. У ҳофиз бўлма-сада, шу жамоанинг уста доираси экан.

1970 йил. Ўзбекистон ССР Давлат санъат музейида мусавирларнинг асарларини томоша қилаётиб, Тўйчи ҳофизнинг портретини учратиб қолдим. Севинганимни асти қўяверасиз. Ҳофиз ҳақидаги барча хотираларим гавдаланди.

... Миллий кийимли мўсафид сўрида ўтирибди. Воқислар тетик. Ширин ўй-

хаёллар оғушида. Ҳаётдан мамнун эканлиги шундоққина билиниб турибди. Бу ажиб сиймо халқимизнинг азиз табаррук куйчиси Мулла Тўйчи ҳофиз Тошмуҳамедов эканлигидан унинг мухлислари фахрланишади.

Ўзбекистон ССР халқ расоми Лутфулла Абдуллаев ҳофиз билан яқиндан таниш бўлган. Унинг классик шеърлар билан айтилаётган қўшиқларини кўп тинглаб, санъатига, ижрочилик маҳоратига махлиё бўлган. Лутфулла ака Тошкентдаги мусавирлар билан юртида дарс беради. Тўйчи ҳофиз Алишер Навоийнинг машҳур «Қаро кўзим»ни айтганда унинг илҳомини жўшиб, шундан бери ҳофизнинг асл қиёфасини яратиш ишқиде ёнганини хотирлаш ўринлидир.

Машҳур санъаткор халқимиз орасида мангу яшамоқда.

Аҳмад РАМАЗОНОВ.

Қатрлар

БУЛБУЛ

ГУЛЛАРИНИНГ қирмизи лабидида шудринг томчилари тонг ёғдусида милтиллаб кўринди. Булбул гулдан-гулга кўниб, шўх сайради.

— Овозинг ёқимли экан. Дўст бўламиз. Шу ерда қол, — илтимос қилди Наргиза булбулдан.

— Дўст бўламан-у, узокроқ туролмайман.

— Нега? — ҳайрон бўлди Наргиза.

— Сезмаясанми, ҳавода қўланса ҳид бор. Бўғилиб кетяпман. Чанқасам нима қиламан? Оқар сувинглар ҳам ифлос экан. Ичолмайман, — жавоб берди булбул бироз сайрашдан тўхтаб, — Табиат тоза, сўлим бўлганда қайтиб келаман. Хайр. Ҳа-фа бўлма...

Наргиза булбулнинг шартини кўпчиликл-ка айтди. Булбулдан ҳамон дарак йўқ. Айт-тинг-чи, нега?

МАРМАР ТОШ

— Ким экан у? — ҳамроҳидан сўрайди отахон қабристон томонга ишора қилиб.

— Ёш олим, оти, ҳаҳ... Онасига мрамр тош қўйяпти.

— Танидим. Онаси ҳаётлигида ҳолидан хабар ололмаган. Шу қилаётган чикимининг юздан бири онасига олма ё анор учун сарф бўлганда қандай чиройли бўларди, а?!

— Ким билади, — елкасини қисади ҳамроҳи, — ишга ўралашиб она ҳурматини баҳо қилишга кечикканми?!

— Фарзанд давлат ишига кечикиши мумкин, — унинг сўзидан қониқмайди отахон. — Кечроқ олим бўлиши ҳам мумкин. Бироқ, она интизор бўлиб турганда кечикиши яхши бўлмас.

— Бояқиш бу ҳақида кимдандир гап эшитганов. «Тириклигингизда кўнглингизни ололмадим, кечиринг, онажон» деб куйин-япти, ана, қулоқ солинг, — дейди ҳамроҳи бошини куйи эгиб.

Улар жим, жим. Отахоннинг назарида мрамр тош онасига кечиккан ҳурмати учун фарзанднинг афсус-надоматига ўхшайди.

Ғани АБДУЛЛАЕВ.



Ниятим олам нон исига тўлиб кетсин!

Миллий либосларимиз

НИМЧА

ЕДИМДА, болалигимда ойимнинг эгиларидан бахмал нимча ҳеч тушмасди. Бу либосни бошқа аёлларда ҳам кўп кўрардим. Ҳатто қизалоқларга ҳам ихчам, бежирим қилиб тикиб бериларди.

Нимчанинг фойдали томонлари ҳақида кекса онахонларимиз гапириб беришган. Қиш ёки кузда уни кийганлар сира шамоллашмас, кўкрак, кураклар, айниқса белни доим соғлом ва бақувват тутаркан.

Илгари турмушимиз оғир кечган дамларда нимча ихчамлиги, нафис, арзон, чидамлилиги билан ажралиб турган. Бу либос нафақат бахмал, балки атлас, бекасам ва бошқа мато-лардан ҳам мохирлик билан тикилган. У аёлларни сарвақ-мат қилиб кўрсатиши билан ҳам диққатга сазовордир.

Кейинги пайтда миллий кийимимиз тобора камайиб бораётгани кишини ташвишлантиради. Чеварлардан нега тикишмаётганини суриштирсак, замонавий либослар сероб-ку, деган жавобни олаёلمиз. Қўшниларимиздан бири мен билан Ўзбекистон ССР Давлат санъат музейида кўргазмалар-ни томоша қилаётиб, мусавир Ш. Ҳасанова мўйқаламига мансуб «Баҳорги ишлар» асари қаршисида узок туриб қолди. Унинг эътиборини уруш даврида далада ишлаётган аёллар-нинг ташқи қиёфаси тортган эди.

— Қаранг, улар баҳордек очилишибди — деди у. — Кий-нишларига қараганда «Наврўз» байрамига ўхшайди. Бошлар-ида «чаманда гул» дўппи, эгиларидаги лозим ва узун кўй-лакларига нимча жуда ярашган. Уттизинчи йилларда ўлка-мизда «жод қилган рус мусавирларидан Александр Волков «Куз», «Пахта терими», «Эрта баҳор», Валентин Фадеев «Қоровул кампир», Павел Бенъков «Жангичга соғам» каби асарларида нимча кийган ўзбек хотин-қизларини маҳорат билан тасвирлашгани кўпчиликлка манзур бўлмоқда.

Нимча дунё халқлари либоси бўлиб, кўп жойда «енгсиз кийим» дейилади. Уни аёллар эмас, эркеклар ҳам қадрлаб кийишяпти. Ҳозир эркеклар учун ҳатто чет эл чеварлари костюм билан киядиган нимчалар чиқаришяётгани маълум.

Шундай бўлишига қарамай ўзимизнинг либос ҳар томон-лама пухта, чиройли, ўлчами ва тикилиш услуби жиқатдан аққол ажралиб туради.

Мақсуд АҲМЕДОВ.

Акс-садо

ҚЎШНИЧИЛИККА
НИМА ЕТСИН

БОЛАЛИГИМ кўпчиликлка маълум Чигатой даҳасининг «Коминтерн» маҳалласида ўтган. Уша кезлари деярли ҳар бир қўшничиликнинг деворида эшик бўлиб, байрам кунлари, тўй ва бошқа йиғинларда бир-бири-мизни қўтлардик. Агар бирор оила бошига мусибат тушса ҳамдардлик билдиришга асқо-тарди. Наврўз айёмларида кат-та дошқозонларда ҳалим ва сумалаклар тайёрлаб, қўш-қўшниларга қўшни эшик орқа-ли улашганларимиз эдимда.

Ҳозирчи! Бугунги кунда қўш-ничиликдаги ана шундай анъ-ана унутилиб юборилаётгандек туюлади назаримда. Шу боис «Маҳалладаш» рўзномасининг шу йил 11 июль сониде «Қўш-ни эшик керакми?» сарлавҳали мақола эълон қилиниб, жуда тўғри қилинган. Бу мақола шубҳасиз кўпчиликни баҳсга чорлайди. Оқиқ тан олиш лозим, баъзилар ён қўшни-чликка девор очиш у ёқда турсин, ҳатто тўй-маъракаларга чиқмайди ҳам. Ҳатто бир қарич ер талашиб сан-манга бораётган, юз кўрмас бўлиб кетаётганлар ҳам учраб тура-

ди. Шу мисраларни ёзаяпман-у, атоқли шоиримиз Мақсуд Шайхзоданинг инсонийлик ва ўзлгимизни англаш хусусида ёзган мисралари ёдимга туш-ди.

Одамлар, яхшиларин
авайлаб асранг,
Салом деган сўзинг
салмоғини оқланг.
Улганга юз соат
йўглаб турмасдан,
Уни тирикликлда
бир соат йўқланг!

Ушбу сўзлар замирида олам-олам маъно бор. Зеро, бу фоний дунёда ҳамма бир-бирига ғаниматдир. Келинг, қўшнижонлар, ўтмишдаги бар-ча гина-қудуратларни унутиб, ота-боболаримизнинг удумига содиқ қолган ҳолда бир-бири-мизга меҳр-оқибатли, шафқат-ли бўлайлик. Қўшничилигимиз ришталари ҳаммаша мустақкам-ланиб бораверсин. Ана шунда-гина ҳаётимиз янада чароғон ва файзли бўлади.

Мақсуда ЗОИРОВА.

Тошкент тиббиёт олийгоҳига қарашли 2-тиш қўйиш поликли-никаси ходими.

ЖИДДИЙ ШУҒУЛЛАНИШ ВАҚТИ КЕЛДИ

«ҚОРАСУВ-6» даҳасидаги «Наврўз» маҳалласи аҳолиси асосан эски уйларда истиқомат қилишади. Тўғри, кейинги бир икки йил ичида кўп қаватли уйлар қурилган, бу ерда мактаб ишга тушди. Маҳалла болалари онда-сонда унинг ўйингоҳига тўпланиб, футбол ўйнаб туришади. Аммо уларга бундай ўйнаш керак, ундай қилсанг яхши бўлади, деб ўргатувчи мураббий йўқлиги ачинарлидир.

Бошқа спорт турлари тўғрисида гап бўлиши мумкин эмас. Чунки ўзи бўлмагач нима ҳам дейиш мумкин. Болаларнинг бахтига шу атрофда шарт-шаронглири бўлган бирорта ўйингоҳ йўқ. Улар қаерга ҳам боришсин? «Павтор»гами. У ерга ҳамма-ни қўйвермагани бир томони, иккинчидан вақт масаласи билан ҳисоблашиш керак. Аҳвол шундай бўлган полвонлар ва машҳур спортчилар қандай етишиб чиқишсин. Ўзбекистон жисмоний тарбиянинг моддий базасини ривожлантириш бўйича мамлакатда оқсаб келмоқда. Маълумотларга қараганда, спорт заллари билан таъминлаш 30 фониздан камроқ, иншоотлар қуриш эса 40 фонизга бажарилар экан. Айниқса сув ҳавзалари ниҳоятда кам. Биргина пойтахтимизни олиб кўрайлик. Болалар маза қилиб чўмилётган неча сув ҳавзасини бизга санаб бера оласиз? Бештами, ўнтами...

Жисмоний тарбия иншоотлари майдони азелдан ҳар бир кишига 1,2 квадрат метр қилиб белгиланган. Бутун «Қорасув» даҳаси бўйича эса битта ҳам спорт иншооти йўқ. Бўлмаса бу масканда кам деганда 30-40 минг аҳоли яшайди. Сўз билан ишнинг бирлиги қани? Фақат қоғозда холосми? Энди шунча одамга қанча квадрат метр спорт майдончаси керак эканлигини ўзингиз ҳисоблаб чиқаверасиз. Район раҳбарларининг

яқин беш-ўн йил ичида шу атрофда бирон бир спорт иншооти қурилиши тўғрисида гапирганини биз ҳали эшитмадик. Менимча, бу яқин орада амалга ошадиган иш эмасга ўхшайди.

— Барча ишларни аввало маҳаллалардан бошлаш керак, дейди «Наврўз» маҳалласи фаоли Йўлдош Маҳмудов. — Бизда эса акси бўлиб чиқмоқда. Турар жой коммунал хўжалиги вазирлигидегилар жисмоний тарбия ишларини ривожлантиришдан ўзларини олиб қочишади. «Спортнинг бизга нима нафи тегибди? Бу масала билан спорт комитети шуғуллансин», дейишади.

Ҳа, минг афсуски шундай. Шунинг учун ҳозир Тошкент шаҳрида корхона ва муассасалар кучи билан қурилган 1300 дан зиёд спорт майдончаларининг ҳолига маймунлар йиғилади. Уларнинг бариси таъмирталаб.

Жисмоний тарбиядан йироқлашиш кишилар саломатлигига салбий таъсир кўрсатиши сир эмас. Инсон доимо спорт билан шуғулланиши зарур. Спорт анжомлари ва либосларининг нархи бироз паст бўлса эди. Катта-катта иншоотлар ҳозир халқ учун эмас, ўз-ўзига хизмат қилмоқда. Маҳаллаларнинг маълум қисми маҳаллаларда спортни ривожлантиришга ажратилса мақсадга мувофиқ бўларди.

Майдончалар, теннис кортлари, сув ҳавзаларини хўжалик ҳисобига ўтказиш керак, деб ўйлайман.

Қисқаси, маҳаллалар билан жиддий шуғулланиш вақти келди. Бу — ҳар биримизнинг олдимизда турган масъулиятли вазифадир. Қачонки спорт ривожлансагина ўзбек фарзандлари дунё кезиб, халқимизни машҳур қилишади.

Мирза АБДУЛЛАЕВ.



Бугун келдик мактабга, қалбимда шодлик олам. Қўлимдаги гулимда меҳру муҳаббатим жам. Равиль Альбеков сурати.

Уйни таъмирлаш санъати

ДИДЛИ ВА НАФОСАТЛИ

Оч яшил ва ҳаворанг бўёқлар ишлатилганда руҳингизга яхши кайфият баришласа, кўк ва қизил ранглар ҳорғинлик уйғотишини унутманг.

Хонанинг қоронғилигига қараб, мос равишда оч ранглар танланса хона шунчалик ёришади.

Коридорни тўқ рангга бўянг, шунда у кенгроқ кўринад.

Етоқхонага бир хил рангдаги, майда гулли обой қоғозлари елимлангани маъқул.

Ҳарир дарпарда девор рангига мос келсагина хона нафосат бағишлайди.

Хонада мебеллар кўп бўлса деворга турли рангдаги, йирик гулли обой қоғозлари ишлатишни маслаҳат берамиз.

Полга гилам тўшаладиган бўлса гилам нусхали обой қоғозларидан фойдаланманг, жуда қўпол кўринади.

Ювиниш хонасини таъмирлаш учун сув ўтказмайдиган махсус кафель топилмаса, унинг ўрнига оддий полиэтилен пленка асқотишини унутманг.

Томорка хўжалигингизда

УЗУМГА ШИРА КИРДИ...

ҲОЗИР боғлар болга тўлиб, айни ҳосил етила бошлаган палла. Хонадонларимиздаги сўриларга бир текис таралган тоқларда ҳам ғужум-ғужум узумлар товланиб, кўзни қувонтиради.

Узумга шира кирган пайдан бошлаб ҳосилни ғужгон ўйнаётган арилар ва қушлардан сақлаб қолиш ўзига хос билимдонликни талаб қилади. Докдан халтачалар тикиб ҳар бош

узумга кийдириб чиқишни тавсия қиламиз. Бунинг иложи бўлмаган жойларга қоғоз ўраб қўйса ҳам бўлади.

Қушлардан қўриқлаш мақсадида сўрининг ҳар жойига шалдироқ қоғозлар ёки қуёшда товланиб турадиган турли хил ленталардан осилтириб қўйиш мумкин.

Собир БОЗОРБОВЕВ, ҳаваскор боғбон.

Бемор турли ҳолатларда

ҲАЯЖОНДА

МАШҲУР спортчи оғир беморлиқ қолди. Дўхтир унинг ҳароратини ўлчаб кўрди-да: — У-хў! — деб юборди. — 39,2 даражага чиқиб кетибди-ку.

— Жаҳон рекорди қанча? — ҳаяжонланиб сўради бемор.

ФАН МЎЪЖИЗАСИ

АВТОМОБИЛЬ фалокати туфайли қўли қаттиқ шикастланган бемор соғая бошлади. Ҳамшира унинг ярасини боғлар экан, деди:

— Бу қўлингиз билан энди ҳамма ишни қилаверасиз, ҳатто уларни олдингидан ҳам яхшироқ бажарасиз.

— Рояль ҳам чала оламаними?

— Рояль ҳам чала оласиз.

— Ана мўъжиза-ю, мана мўъжиза! Ахир илгари мен рояль чалишни мутлақо билмасдим-а.

НУМИЗМАТ

— Тезроқ келинг, дўхтир... Қизим олтин тангани ютиб юборди.

— Еши неччада?

— 1814 йилда зарб қилинган.

ОҒОХЛАНТИРИШ

КАСАЛХОНАГА келтирилган беморнинг кўйлагига қадалган хатчада шундай дейилганди:

«Ҳурматли шифокорлар! Тутаётган хуруж кўричакники эмас, тутқаноқ касалим бор, шунинки эканлигини ҳисобга олсангиз, Бундан ташқари, кўричакимни уч марта олиб ташлашган...»

ХАВФЛИ ТАСОДИФ

БИР микроб бошқасини учратиб қолиб, деди:

— Негадир бугун кўринишинг яхши эмас... Нима бўлди сенга?

— Яқинлашма... Назаримда менга пенициллин текканга ўхшайди.

ҲИСОБДАН ЯНГЛИШУВ

— Ҳисобимизда неча ўлганлар бор?

— Тўққизте, жаноб професор.

— Лекин мен, эсимда бор,

ўнта рецепт ёзиб бергандим-ку.

— Унингисиз дорини ичишни хоҳламади.

ШҲҒИШ

— Сув билан даволашнинг қандай турларини биласиз?

— Ювиниш, баданни хўл сочиқ билан артиш, чўмилиш!

— Яна?

— Сувга шўнғиш, ТИББИЁТ ХОДИМИ ЕН ДАФТАРИДАН

«Кексалик фақат ёш ҳодисаси туфайли келиб чиқади».

* * *

«Эмбриологлар инсон, умуман, суяклар билан туғилишини исбот қилишган».

* * *

«Ёш болалар кўпроқ касал бўладилар, чунки улар ҳаёт йўлларида нимаки учраса, ҳаммасини оғизларига тикавердилар».

Абдумажид ШОМИРЗАЕВ тайёрлаган.



Ҳадемай ой ботади, тоғ отади. Қуёш булутларнинг чокни йиртади.

Холмат Мирзакаримов сурат-лавҳаси

ТОЖИВОЙ ТАЖАНГА КЕЛГАН ХАТЛАРДАН



ҲУРМАТЛИ Тоживой ака! «Себзор» даҳасида яшовчиларга қўлайлик яратиш мақсадида «Ганга» дўконининг олдида Собир Раҳимов номидаги кино-театргача бўлган серкатнов кўчага кенг қилиб асфальт ётқизилди. Бундан одамлар жуда хурсанд бўлишган эди. Аммо юзага келган бошқа қийинчиликлар кўпчиликини ташвишга солмоқда.

Гап нимада ўзи дерсиз. Эшитинг бўлмаса, Кўча асфальтлангани билан унинг икки томони

Мутасаддилар

зора уялишса

ҳали ободонлаштирилгани йўқ. На ойномалар дўкончаси, на сув сотадиган дўкончалар ўрнатилган. Бекатларнинг бирортасида соябон бўлмаганидан транспорт кутаётган йўловчилар жазирама иссиқда тангадай соя бўлса ўзларини ўша ёққа уришади. Ҳозир-ку майли, ҳадемай ёғин-сочин бошланса аҳвол не кечади? Бунинг устига 2,7-троллейбусларнинг қатнови ҳам кўнгилдагидек эмас.

Ягона умидимиз сиздан, Тоживой ака, Собир Раҳимов районининг ободонлаштириш бошқармасига бир сим қоқиб қўйсангиз, Зора мутасаддилар сиздан уялиб, ёрдам қўлларини чўзишса.

«Себзор» даҳасида яшовчилар номидан:

Иззат АҲМЕДОВ.